

DISSERTATIO INAUGVRALIS MEDICA,

29

DE DYSENTERIA CASTRENSI, SEV PANNONICA,

QVAM

AUXILIANTE NUMINE DIVINO,
RECTORE VNIVERSITATIS MAGNIFICO,
PRÆNOBILI ET CONSULTISSIMO

DN. TOBIA JAC. REINHARTHO,

JCTO, SACRI PALATII CÆSAREI COMITE, IVRID. FACVLT. ASSESSORE,
ET PROFESS. COD. PVBL. ORDIN. CIVITATIS SYNDICO
ET CONSVLE,

AMPLISSIMO MEDICORVM ORDINE IN HAC PER-ANTIQA
HIERANA GRATIOSE INDVLGENTE,

SVB PRÆSIDIO

DN. LAVR. THEOPHILILV'THER,

MEDIC. DOCT. CHTMIÆ PROFESS. PVBL. FACVLTAT. MED. ASSESS. ORDIN.
ET CIVITAT. ERFORD. CONSVL. SENIOR. N. N. PHTSICI
ADJVNCTI,

PATRONI AC PROMOTORIS SVI COLENDISSIMI,

PRO GRADV DOCTORIS

SVMMISQVE IN ARTE SALVTARI PRIVILEGIIS ET IM-
MVNITATIBUS RITE ET SOLENNITER IM-
PETRANDIS,

PVBLCÆ ERVDITORVM DISQVISITIONI SVBMITTIT,
AVCTOR ET RESPONDENS,

CHRISTIANVS Gottlieb Selsmann/

Lignic. Siles.

IN AVDITORIO MAIORI COLLEGII MAJORIS, HORIS CONSVETIS.

DIE IX. JVNII M DCC XXXII.

ERFORDIÆ, Typis JOH. CHRISTOPHORI HERINGII, Acad. Typogr.

LIBRARY OF THE U.S. DEPARTMENT OF THE INTERIOR

DE BYZANTINA

174512A3



DISSERTATIONIS INAUGVRALIS MEDICÆ
DE
DYSENTERIA CASTRENSI,
SEV
PANNONICA,
PRO O E M I V M.



Vam gravia, fontica ac pernicioſa, quamque innumera malorum & morboſorum pathematum genera plerumque ex turpiſſimâ illâ hominum militarium intemperantia, nefandaque voracitate ac ingluvie prognaſcantur, quilibet in caſtris vel leviter ſaltem oberrans ad naufeam uſque deprehendet & in-

veniet: Habent enim Castra hoc peculiare & nusquam fere alibi citius comparandum, quod scilicet vix unquam, aut alia quadam occasione, major omnis generis cruditatum ac impuritatum summè noxiarum copia & quantitas colligatur, producatur & accumuletur, quam quidem tunc, quando sumtibus alienis suo gaudet jure proterva gens militum, adeò, ut non immeritò jam dudum remis velisque eò allaborandum esse dictitaverint cordatiores Medici aliique, quo ab hoc spontaneæ vesaniæ genere miles quam longissimè arceretur, & legibus sumtuariis, rigore castrensi ad strictè servandum promulgatis, exquisitè parere cogatur. Ast, cum plerique horum hominum helluationibus diurnis nocturnisque, antequam ad castra eant, nimium quantum indulgere iisque ad nauseam ferè pergræcari soleant, adeoque rarissimè nomina sua dent militiæ, nisi prius per sesquimensē nonnunquam, miseris colonis oneri longè gravissimo tandem futuri, gulæ Bachoque strenuè litaverint, unde dein plerumque evenit, ut vix jam in primo limine castra Martis salutantes, continuo ante adsuetae

cra-

crapulæ poenas dent justissimas, dum morbis periculosisimis ac molestissimis obruuntur, excruciantur, tandemque non rarò summa sub penuria atque miseria è medio tolluntur.

Neque vero hoc iis tantum unicè solenne esse observamus fatum, qui prægressâ assiduâ quorumlibet alimentorum ac potulentorum puriorum ingurgitatione sanitatem suam nimium quantum debilitârunt, antequam in campum deducti fuerunt; sed simile quoque periculum ii pariter subire coguntur, qui, perfectâ cœteroquin ac inconcussâ sanitate gaudentes, in castra descendunt, quoniam ex diætâ fatis dura ac impura, quæ plerumque ibidem servanda diuque non rarò continuanda est, brevi temporis intervallo tanto humorum excrementitiorum diluvio corpora ipsorum inundantur, ut omnis generis morbis itidem facillimè, insontes licet, tandem exponantur & subiciantur, ob ingentes nimirum cruditatum sentinas ex phlegmate crudo, acido, vitreo, falso, ex bile citrina, pallida, vitellina, æruginosa, isatode, aliisque humoribus impuris, acidis, acribus, confermentantibus, largè circa primas vias

& connexa viscera collectis atque congestis. Crudum enim phlegma vix ullibi locorum plus citiusve coacervabitur, quam in hoc cruditatum Oceano, ubi ex largiori ingestione quorumvis horariorum fructuum, tenuior & acrior, ex carniū semi-crudorum, induratorum aut salitorum ingurgitatione, crassior magisque lenta pituita, naturali longe deterior, semper accumulatur. Acidorum vero humorum abundantia, ex potulentorum depravatorum copiosiori assumptione potissimum producta, cum in toto corpore causa majoris cruditatis, flatuum atque vaporum sit, in ventriculo vero causa famis existat, tanto magis in quantitate sua perniciosa augebitur, quo magis famēs ad cruditates expetendas acore hoc stimolata, in castris excitata & vehementior reddita fuerit. Vitreum porro phlegma, omnium tenacissimum, quod itidem diætæ castrensi familiarissimum sit, colicæ gravissimæ & illæ sæpius ibidem epidemicæ, abundè testantur, quemadmodum & sitis, apud plerosque non dum perfectè ægrotantes, salisam pituitam excrementitiam, ventriculo impactam & inhærentem, exactè

etè prodere solet. Bilis denique abundantis ac depravatæ, ad inducendos & provocandos gravissimos morbos aptissimæ & efficacissimæ, an ullibi major colligatur copia, majoresque ex levi quacunque causa ebullientis inducantur fervores, quam in castris, vix unquam dubito, quoniam plerumque simplicissimum hoc genus hominum, milites puta, tunc demum bellè secum actum esse autumat, si plurimo, imprimis ex raptu parto potu, tam vinoso, quam spirituosso, quotidie ad insaniam ferè inebriata fuerit, parum interim curans, quantas insolitis hisce cupediis secuturorum morborum flammæ in proprio corpore succendat, imprimis vero fonticas atque perniciosas febres, tam acutas, quam lentas, inflammatorias & exanthematicas, nec non diarrhœas summè torminosas atque diuturnas, ex levissima superveniente causa tandem facillimè in lethales *Dysenterias* degeneraturas, concitet atque inducat. De his omnibus vero cum specialius jam agere, singulaque ista mala, quæ miseros tales homines hoc sub vitæ genere crebrius infestant & catervatim trucidant, fusius percensere nec tempus nec

nec instituti ratio, nec spatium ipsum permittant, nunc unicum saltem, eumque & frequentissimum & gravissimum, seligere atque loco Speciminis inauguralis paulò exactius pertractare lubet affectum, modo memoratam nimirum *Dysenteriam*, cujus specialem genium & indolem, quam tunc demum exhibet, quando in *castris*, præcipue vero in *Pannonicis regionibus*, uti sæpius fieri solet, epidemicè grassatur, eâ quâ decet ac per ingenii imbecillitatem licebit, sedulitate atque dexteritate, adumbrare ac delineare constituimus. Ut autem summus Archiater, Deus T. O. M. cœptis hisce clementissimè annuat, omniaque eò præcipuè dirigat, quo in Divinæ Majestatis gloriam & decumbentium salutem felicissimè cedant, humillimis supplicibusque nunc obtestor precibus.

§. I.

Licet hodiernum in Scholis Medicorum satis abundè jam jam cognitum sit, qualisnam affectus propriè sub *Dysenteria* titulo intelligatur & comprehendatur, adeoque philologica & critica hujus vocabuli explicatio minus necessaria, imo planè superflua videatur, cum præcipuè hæc parum aut nihil ad morborum profligationem conducat, quoniam
non

non verbis, sed herbis curatio eorundem rationalis institui debet; nihilo tamen minus, cum nominum significata probè distinguere, juxta GALENI effatum *Lib. III. de simpl. med. facult. cap. 2.* magnum habeat momentum & facultatem ad veram eorundem cognitionem, paucis saltem, pro rei exigentia, ne prorsus ἀπεθόδας instituat^r tota hætractatio, ea, quæ ad nominis evolutionem pertinent, reali affectus nostri considerationi præmittere placet.

§. II.

Dysenteria igitur vocabulum, græcos agnoscens natales, procul dubio vel à parte tantum affecta, vel ab hac & symptomate urgentiori simul, juxta præfatum GALENUM *Lib. II. meth. med. cap. 2.* desumptum est: Componitur enim ex usitata particula δδς, quæ, si principiis nominum apposita fuerit, communiter *difficultatem*, vel potius, ex mente SCALIGERI *Comment. in Aristot. Histor. Anim. Lib. X. cap. 43.* in hoc casu *malignitatem* designat; cui vocabula ἐντέρον *intestinum* & ῥέειν *fluere*, juxta BLANCARDUM in *Lex. Med.* adjuncta sunt, ut hac ratione *difficultatem* molestam & torminosam *intestinarum*, aut potius *difficilem* vel *malitiosum* *intestinarum fluxum* designet.

§. III.

Obtinuit autem, ratione Synonymiæ, truculentus hicce affectus, præter vulgatissimum hoc, etiam alia nomina à diversis Autoribus, quibus indolem ejus forsitan clariorem reddere annisi fuerunt, quandoque vero etiam magis obscurârunt: Sic CELSO *Lib. IV. c. 15.* sub nomine *torminum cum exulceratione intestino-*

rum venit, quoniam totus plerumque intestinorum canalis gravissimis statim doloribus sub eodem excruciat-
tur; PARACELSO & WALTHERO in *Sylv. med.* p. 488.
audit morbus dissolutus; DIETERICO in *Fatr. Hippocr.*
p. 373. *rheumatismus torminalis*; à COELIO AVRELIA-
NO vero *rheumatismus cum exulceratione*, & à Magnif.
b. m. WEDELIO, in *Amœnit. mat. med.* p. 235. vocatur *hy-*
percatarsis spontanea. Ab aliis vero *cruentum alvi pro-*
fluvium, *fluor dysentericus*, *diarrhœa cruenta*, *exulceratio*
aut excoriatio intestinorum, vel etiam *febris ad intestina*
conversa, appellatur. Germani usitatissimo vocabulo,
die rothe Ruhr, eundem indigitare solent; in quibus-
dam autem regionibus, *das rothe Durchlauffen*, item
die Darm- oder Blut-Ruhr dicitur.

§. IV.

Quod denique Homonymiam concernit, vario
itidem sensu hæc vox communiter accipitur, & qui-
dem *generaliter*, apud antiquiores Scriptores, omnes
alvi fluxus, seu *diarrhœæ incruentæ*, sub eâdem compre-
henduntur, quorsum propterea etiam pertinet illa WIL-
LISII *Dysenteria incruenta*, quam in *Pharmac. rat.* p. 194.
describit, ut & *fluxus ille dysentericus*, qui Ao. 1625. Lug-
duni Gallorum epidemicè grassatus atque ideo à JOH.
LAMONIERE in peculiari Tr. descriptus est, sub qui-
bus, licet magnam fecerint stragem, tamen ne mini-
ma sanguinis molecula excreta fuit. *Specialiter* dein
usurpatur de omnibus *cruentis alvi fluxibus*, juxta CLAV-
DINVM *Consultat. med.* XLII. p. 476. quorum quatuor
communiter species habebant Veteres: *Primam* harum
deducebant à copia sanguinis, vel ob partem quan-
dam

dam insigniorem corporis abscissam, vel consueta exercitia subito omissa, vel evacuationes solenniores & maximè familiares suppressas; *alteram* vocârunt *hepaticam*, ubi nimirum sanguis serofus, loturam carniū recens mactatarum referens, quem ab Hepatis imbecillitate, cui sanguificationis negotium unicè adscripserunt, oriri autumabant; *tertiā* appellârunt *melancholicam*, & in eā sanguinem, propter longiorem moram in hepate quasi adustum, nigrum atque splendentem, per alvum excerni asseruerunt; in *quarta* vero non nisi sanguinolenta brevibus intervallis, admixtis simul excrementis humoreque quasi purulento, cum insignioribus doloribus atque torminibus & conjuncta febre plus minus acuta, frequenter egeri dixerunt, quæ ipsa etiam in sensu *specialissimo* illa propriè Dysenteria est, quam hodièdum κατ' ἐξοχὴν sub hoc titulo propriè intelligimus, eaque propter pro objecto præsentis Dissertationis inauguralis nobis selegimus, ita tamen, ut non nisi singularem ejus indolem, causas atque symptomata, quæ tunc maximè observantur, quando in castris militum, & præcipue in Hungaricis provinciis, pessimus talis affectus epidemicè grassatur, concinno ordine describamus, recenseamus & evolvamus; hinc quoque, ad evitandam omnem confusionem, non immeritò eandem *castrensem*, seu *pannonicam*, appellavimus *Dysenteriam* in fronte hujus tractationis, ut exactè statim innotescat, quod illum præcipuè alvi fluorem cruentum subintellectum velimus, qui alias sub nomine der Ungarischen Ruhr venit, totamque sæpius Europam fortiter perterruit, quoniam non modo in ca-

stris ab initio profusam edit stragem, ut plures non raro contagioso hoc affectu, quam hostis gladio pereant; sed & insuper facillime aliis quoque regionibus, ad instar luis cujusdam pestiferæ, communicatur, similemque ferè tragœdiam ibidem exhibere observatur.

§. V.

Est autem CASTRENSIS talis DYSENTERIA frequens, cruenta summeque dolorosa alvina dejectio, modo cum fecibus alvinis, modo cum materia mucosa vel prorsus purulenta conjuncta, à miasmate quodam specifico & abinde producta acriori humorum fermentatione, inflammationem intestinorum tam tenuium, quam crassorum, phlegmonodeam tandemque excoriationem tunicæ eorundem villosæ & interdum quoque nervosæ, producente, excitata, & cum febre acuta plerumque maligna magis, quam benigna, nec non molestissimo tenesmo, ani procidentiam sæpius causante, aliisque gravioribus symptomatibus stipata.

§. VI.

Ex hac igitur truculenti hujus morbi descriptione, abunde statim cuilibet innotescit, quod pro parte principaliter in eodem affecta utique universum intestinorum canalem, tenuia nempe pariter ac crassa, agnoscamus: Quanquam enim SPIGELIUS, BARTHOLINUS aliique, juxta relationem HORSTII Lib. III. obs. 20. in Dysenteria, potissimum epidemia, intestina crassa magis pro principali ejusdem subjecto venditent, hoc tamen non obstante ipsa etiam tenuia, utpote ratione situs affluxui, collectioni & confermentationi depravati liquoris gastrici, bilis & humoris pancreatici propinquiora, præcipuè primis morbi diebus, semper gravius affli-

affliguntur, prout hoc ipsum sectiones dysentericorum à BARBETTE *Lib. IV. Prax. c. 5.* BONNETO in *Sepulchr. anat.* & in *A. N. C.* hinc inde descriptæ, exacte testantur. E contra vero successu temporis, & in statu morbi, utique crassa intestina multum imò plurimum patiuntur, inprimis vero rectum, propter continuam vellicationem, arrosionem atque constrictionem, sub fecum dejectione potissimum occurrentem, unde postmodum interior ejus tunica plus justo relaxatur & simul tali ratione molesta illa satisque fontica sæpius ani procidentia excitatur.

§. VII.

Partem vero *secundariò affectam* quod attinet, hanc constituunt ex parte ventriculus cum œsophago, testimonio prostrationis appetitus, vomitus, anxietatum præcordialium, singultus, aphtharum, &c. quæ omnia in dysentericis successivè occurrere solent, ipsaque hæc viscera ægerrimè quoque afflicta esse demonstrant; ex parte vero etiam tota sanguinis massa eandem sistit, quatenus nimirum à specifico miasmate subtili, orgastico, halituoso, ab extra corpori communicato & insinuato, nec non à copiosis particulis acribus & fermentativis, circulando ex intestinorum canali in eam penetrantibus, totamque ejus mixtionem & crasin eximè alterantibus & corrumpentibus, illa ipsa nimium quantum depravatur, exagitur & ad suscipiendos alios motus extraordinarios atque insolitos, imò producendos tandem effectus corruptorios, simul quasi præparatur, prout hoc non solum inextinguibilis illa sitis una cum febre plus minus acuta, quæ Dy-

senteriam ordinariè comitantur, sed & ipsæ quoque inflammationes, Gangrænæ & Sphacelismi, in moribundis præcipuè subsequentes, sufficienter testantur. Et huic ipsi sententiæ etiam adstipulatur *venerandus* noster *Senex*, dum *Lib. de affect. Sect. XXIV. n. 9.* ita scribit: Morbus hic fit, ubi bilis & pituita in venas & alvum incubuerint: *Ægrotat quidem sanguis & corruptus secedit, ægrotat autem & intestinum & raditur & exulceratur.* Contrariam vero eidem fovet WILLIAMS, qui in *Tr. de febribus Cap. 10.* massam sanguineam in Dysenteria primariò affectam statuit, ita quidem, ut recepto in sanguinem miasmate maligno, inibi oriatur orgasmus aliquis cum præcipitatione partium quarundam, à quibus dein ad intestina delatis suboriatur erosio cum fluxu dysenterico; ast, cum multæ sub hoc morbo occurrentes circumstantiæ huic hypothese è diametro contrariantur, imprimis, quod sæpe Dysenteria à nullo miasmate, sed solis ingestis qualitate vel quantitate peccantibus oriatur, adeoque benigna tantum & absque febre sit; quod reliqua viscera, exceptis intestinis, intacta maneant à tali miasmate, cum tamen plus sanguinis ut plurimum per illa transeat, quam per hæc, nec non quod Diarrhœa sæpissimè præcedat Dysenteriam & certo respectu ejus causa evadat, citra febrem, quæ non nisi Dysenteriam obortam demum sequitur, adeoque hanc tali ratione inducere non potest; hinc meritò sententiam hancce rejiciendam atque Autori & fautoribus suis ulterius comprobendam relinquimus.

§. VIII.

Cum vero præter Dysenteriam plures quoque alii in Praxi frequentissimè occurrant affectus, sub quibus itidem cruentæ dejectiones alvinæ, satis itidem dolorosæ, observantur, ac in nostro affectu, probè utique ante omnia demonstrandum erit, quâ ratione potissimum ab iis distinguatur Dysenteria, ut dein genuinam ejus indolem tanto exactius cognoscere queamus. A Diarrhœis igitur sic dictis *torminosis* & biliosis differt tam modo, quam tempore grassationis, quorum intuitu hic affectus plerumque epidemicè & præcipue incunte autumnalitempore, grassatur; illæ vero indiscretim omni tempore, simulque magis sporadicè tantum occurrunt. Dein differunt gradu torminum atque dolorum, qui semper longe major in Dysenteria, quam in his excretionibus observatur, sub quibus insuper etiam excrementa magis mucida, aut citrina, vel viridescencia, non vero adeò cruenta & quasi purulenta, uti in nostro affectu fieri solet, egeruntur. A fluxu vero hepatico hic ipse morbus potissimum sese distinguit ratione consistentiæ excrementorum, quæ in illo magis fluida & lenitantum colore rubicundo tincta sunt, ita ut loturam carniū ferè referant, simulque etiam sine notabili dolore aliisque symptomatibus gravioribus ejiciuntur; quorsum etiam accedit, quod, si fluxus ille hepaticus uno alterove die supprimatur, communiter brevi post, sine doloris in sede sensu, sponte redeat, juxta FROMMANNVM Tr. de hæmorrhoid. Prob. XLIV. ubi è contra in Dysenteria quælibet intempestiva ejus suppressio semper majora incommoda atque pericula inducere solet.

solet. A *cæliacâ* vero *passione* & *Lienteria* quomodo facillimè statim distinguenda sit *Dysenteria*, ex HILDANO præcipue C. IV. *Observ.* sufficienter liquet.

§. IX.

Inprimis autem probè distinguendus erit noster affectus ab *hæmorrhoidali fluxu*, & quidem impeditius ac cum torminibus sensibilibus interdum emicante, quippe cum quo multum sanè affinitatis tunc exhibere observatur, adeoque facilè, notante VILLANO-VANO in *Breviar. Practicæ Lib. II. Cap. 26.* subjecta hæmorrhoidalia cum dysentericis, aut graviori saltem tenesmo vexatis confundi possunt. Interim tamen, si Practicorum evolvamus scripta, luculenter ex mutua utriusque affectus collatione apparet, quod sanguis in fluxu hæmorrhoidali quandoque post, sæpius vero ante & interdum simul cum fecum exclusione simul, & quidem, quæ palmaria est circumstantia, semper purus, distinctus & separatus ab ipsis fecibus prodeat; hinc, si tali ordine & modo sanguinem excerni observamus, si feces naturalis sint consistentiæ, si eadem sine admodum notabili peristole aut contractione intestinorum, quæ sub qualibet dejectione sub *Dysenteria* percipitur, egerantur, si denique sanguis copiosior excernatur, (cujus paucissima tantum portio ordinariè excrementis intermixta est in nostro affectu,) tunc certè non dysentericum, sed *hæmorrhoidalem* potius esse fluxum, probabiliter satis concludimus, quæ ipsa sententia tanto magis confirmabitur, si fluxum talem imminentem præsagientia, v. gr. æstus circa spinam dorsi, aut dolorem

lorem tensivum lumborum, ani pruritum, &c. simul adesse vel adfuisse deprehendemus.

§. X.

Lustrata sic differentia, quæ inter Dysenteriam & alios congeneres affectus communiter occurrit, nunc quoque paucis propriam ejus discrepantiam, seu discrimen, quod intuitu variarum circumstantiarum inter Dysenterias observatur, considerabimus. Sic ergo respectu *excretorum* alia est *rubra*, propriè ita dicta & frequentissima, sub qua dejectiones omnes sunt cruentæ; alia vero *alba*, ubi mucosa, purulenta, albicantia, cum ramentis fibrosis copiosioribus intermixta excrementa, absque ulla ferè sanguinis admixtione, dejiciuntur. Ratione *causarum* est vel *publica*, vel *privata*, seu sporadica; ad illam pertinet tam *epidemica*, quæ sæpius per urbes & agros latissimè grassatur, pluresque, ob conjunctam plerumque malignitatem, tunc enecat; quam *endemia*, certis tantummodo locis quasi propria, qualis in specie illa Hybernorum est, cujus meminit SYDENHAMIVS *Oper. sect. IV. cap. 3.* quamque examinasse dicitur BORLASSVS *Tract. de Hybernia.* Conf. etiam VARANDÆVS *de morb. intest. cap. 7.* qui similem quoque Dysenteriam in agro Tholosano observari asserit. Et ad hanc speciem quoque non immeritò hæc nostra *Pannonica Dysenteria* (licet & illa sæpius in istis oris epidemicè grassari soleat,) referenda esse videtur, quæ ab ordinaria maligna quodammodò quoad modum causandi, omnium verò maximè quoad modum affligendi differt, quoniam ordinariè vehementioribus ac gravioribus symptomatibus stipata incedit, majorem.

remque communiter stragem in castris, quam quidem illa in civitatibus, edit, qua de causa etiam COBERVS in *Obs. Med. castrens. Dec. II. Observ. X. in Schol. p. 55.* hasce pannonicas dysenterias *omnium crudelissimas* esse, ex experientia jamjam pronunciavit. Huc pertinent quoque distinctiones dysenteriae in *benignam & malignam, contagiosam & minus talem*, quæ omnibus jamjam notissimæ sunt; nec non in *torminosam*, quæ ordinariè & plerumque occurrere solet, ac in *indolentem*, qualem RHODIVS *Obs. med. Cent. II. obs. 88.* BARTHOLINVS apud BONNETVM *Med. Septentr. collat. Lib. III. sect. X. cap. V.* & WEDELIVS in *A. N. C. Dec. I. Ann. 2. obs. 43.* descripserunt.

§. XI.

Proindè porrò quoque differt ratione *originis & adjunctorum* affectum; prioris intuitu est vel *idiopathica*, per se, absque aliorum morborum concursu oboriens; vel *symptomática*, vel etiam *critica*, quales in peste, febre hungarica, variolis, morbillis, &c. quandoque observantur: Respectu connexorum verò est vel *simplex & solitaria*, nullo nempe alio morbo nec adedò gravibus symptomatibus juncta; vel *complicata*, quæ varios alios morbos simul connexos habet. Sic modo cum febre occurrit, modo etiam sine hac, de qua vid. HORSTIVS *Lib. IV. obs. 20.* Sic quoque cum vomitu cruento conjunctam vidit WEDELIVS in *A. N. C. Dec. I. Ann. 2. obs. 44.* cum morbillis & convulsionibus *Francus à FRANCKENAV ibid. obs. 82.* cum vermibus GVARINONIVS *Consil. 380.* cum ascaridibus AGRICOLA *de dysent. pag. 7.* Quorsum etiam non immeritò referenda erit scorbuticorum illa Dysenteria, magis quidem *spuria*, quam vera, sub-

jectis

jectis hisce, præcipuè in Pomerania, juxta testimonium GERDESII in *Dissert. de Dysenteria cap. VIII. §. 3.* & locis vicinis admodum familiaris, quæ ab ordinaria & genuina Dysenteria in eo tantum differt, quod sanguis fecibus haud permixtus & utplurimum sine omni ferè dolore (si gravativum excipias,) ac torminibus excernatur, aliaque scorbuti combinati signa, ab EVGALENO atque SENNERTO fusius recensita, vel antea præcesserint, vel sub ipsa excretionem ægros adhuc detineant.

§. XII.

Quoad Historiam morbi, ad quam ratione ordinis nunc devolvimur, observanda inprimis erunt signa *antecedentia, concomitantia & consequentia.* Antequam igitur hic morbus in ordinaria sua facie apparet, præcurrunt communiter frequentes, satis tamen leves horripilationes, varii transitorii & vagi intestinorum dolores, lancinationes, murmura & borborygmi; succedunt dein pressiones & anxietates circa præcordia, imminutiones & plenarii defectus appetitus, agrypnia ferè continuæ, sitis & calor quodammodo auctior, cum frequenti ad desidendum conatu, absque tamen notabili excretionem aut ullo levamine, quem tandem plerumque diarrhœa excipit, plus minusvè torminosa, quam sæpius prodromi loco habet hæc Dysenteria, juxta HIPPOCRATEM *Seç. VII. Aphor. 75.* Si dein actu præsens fuerit hic morbus, tunc eundem tanquam *essentialia signa* statim produnt, notante MENJOTIO *de fluore dysent. p. 428.* notissimæ illæ crebriores *cruentæ ac torminosæ dejectiones*, cum molestissimo tenesmo

præcipuè conjunctæ; ipsam verò excrementorum successivè observabilem differentiam & varietatem, sic describit HERLICIVS *de dysenter. p. 10.* quod ab initio prodeuntia excrementa flava & albicantiâ fuisse observaverit, qualia aliàs quoque in diarrhœis egeruntur, hæc secuta sunt spumosa, dein mucosa, tandemque quasi pingua, quæ dein simul modo magis, modo minus cruenta apparuerunt. De reliquo quantitas horum excrementorum minima semper est, sæpiusque nihil planè horum prodit, sed tantum vehementissimo discruciantur tenesmo ægrotantes, qui adeò eximiè tunc urget, ut plerumque ani procidentia subsequatur.

§. XIII.

Sub his ipsis symptomatibus concurrit insuper febris admodum acuta, cum æstu insigni, interiora tamen magis, quam exteriora affligente, cui sitis intensa, summa virium prostratio & maxima præcordiorum angustia junguntur, quæ ultima adeò interdum urget, ut etiam singultus & convulsiones, aut lypothymiaë graviores, non rarò superveniant. Lingua ordinariè muco albo, viscido, est obducta, in aliis etiam sicca, obscure rubicunda & nigra, cum copiosis in eâdem apparentibus fissuris ac supervenientibus tandem aphthis, hanc pariter ac fauces obsidentibus. Sæpiusculè erumpunt etiam petechiæ in cute, sub quibus symptomata omnia graviora ac periculosiora redduntur plurimique ægrotantium ante septimi diei decursum moriuntur. Institutâ dein anatomicâ sectione cadaverum, intestina communiter inflammata & sphacelataprehenduntur, imò in multis apostemata & ulcera ibidem

dem reperta fuerunt, prout hoc inprimis testatur supra laudatus COBERVS loc. alleg. ita scribens : *Dysenteriae panonicae omnium crudelissimae sunt, sic ut primis annis, cum naturam & rabiem morborum Ungaricorum sedulo rimando indagaturus, anatomicè plura cadavera aperuissem, intestina passim pugnum excedentibus apostematibus & ulceribus, perenni serie scaturientibus ebullisse viderim, ut non absque causa confirmatas Dysenterias in castris non curatu difficiles, sed planè impossibiles deinde affirmaverim.*

§. XIV.

Signa autem diagnostica, partem & regionem intestinorum propriè affectam denotantia, quod attinet, ea in sequentibus potissimum consistunt : Si tenuia magis afficiuntur, tunc dolor semper gravior ac vehementior est, ægrique conqueruntur, quod quasi aciculis cultrisque acutissimis intestina compungi atque discindi ipsis videantur, & hanc doloris speciem tunc præcipuè circa umbilicum & in regione epigastrica magis percipiunt; proinde etiam dejectiones paulò tardius & non ita statim post dolores & tormina sequuntur, simulque foetorem paulò magis adversum, ob moram diuturniorem, spargunt & nonnihil chylosæ materiæ cum ramenti tenuioribus continent, insuper denique sanguis ac reliqui humores, ob longiorem viæ tractum, fecibus exquisitè admixti apparent, ipsique ægrotantes insimul ab assumtis medicamentis mitioribus emeticis, magis se alleviari observant, quam ab usu laxantium. Quodsi verò crassa magis laboraverint intestina, tunc dolor est paulò obtusior, simulque magis intra & juxta stomachum ac in utroque hypo-

C 3

pochon-

pochondrio, maximè vero sinistro, juxta ductum Coli nimirum, sentitur; dejectiones etiam, ob materiam proximè circa locum excretionis hærentem, brevi post dolorum augmenta prodeunt, nec usque adeò gravem spirant odorem; sanguis & mucus excrementis vel ab extra tantum adhærent, vel levissimè sunt commixta, imò etiam interdum planè solitariè vel ante excrementa, vel etiam statim post ea excernuntur; tandem non solum frequentiore ad desidendum stimulationem, sed & præsentiozem dolorum mitigationem post clysteres applicatos, quam quidem ab internorum medicamentorum usu, percipiunt ægrotantes.

§. XV.

Reliqua vero humorum potissimum peccantium signa, utrum nimirum à biliosis, an serosis acrioribusve pituitosis maxime productus sit morbus, non nisi ab excrementorum diverso colore, odore, consistentia, aliisque qualitatibus, per adstantes curiosiores examinandis, petenda erunt. Quodsi interim ab inflammatione intestinorum ortum traxerit talis Dysenteria, tunc exquisitissimos cruciatus doloresque pulsatiles, cum majori æstu & ardore circa regionem ita affectam, persentiscunt ægrotantes, ipsaque febris & sitis nimium quantum augentur, ac facilè vomitus atque singultus, imò tandem convulsiones simul complicantur. Si vero à contagio & clandestina quadam malignitate excitata fuerit, tunc præceps ac ferè simultanea virium prostratio, anxietas præcordiorum extraordinaria, summa agrypnia, deliria, vomitus, aphthæ, sudores frigidi, subitanea corporis extenuatio, aliaque morbi virulentiam

tiam indicantia symptomata statim occurrunt & sic statum summè periculosum prædicunt.

§. XVI.

Missis igitur historicis hujus morbi circumstantiis ad ætiologica properantes, *causam ejus immediatam & proximam* in vellicatione, irritatione & stimulatione vehementiori intestinorum, eorumque imprimis tunicæ nerveæ, atque exinde subsequente p. n. constrictione quasi convulsiva ipsorum, consistere reputamus, quippe quæ & tormina ista gravissima, cum tenesmo illo molesto, continuoque desidendi conatu seu stimulo, & ipsas etiam frequentissimas illas dejectiones, tanquam palmaria & essentialia truculenti hujus affectus symptomata, unicè producere & excitare valent. Causam dein *mediatam proximior* constituit p. n. acrior fermentatio humorum bilioso - serosorum, nimium quantum accumulatorum inque crasi & mixtione suâ admodum depravatorum, partim â peregrino, subtiliori & specifico quodam miasmate halituoso, massæ humorum ab extra communicato, partim quoque ab assumtis heterogeneis & confermentantibus substantiis, excitata & introducta: Legitima enim & ordinata se. & excretio bilis, sicuti in statu naturali non parum ad sanitatem integram & illibatam conservandam contribuit, sic & ejus insolita retentio & commixtio cum aliis eidem minus homogeneis humoribus, atque exinde tandem oborta acrior ebullitio, effervescentia ac fermentatio, sanitati vitæque inimicissima est, interque morbos tam huic, quam illi infensissimos, imprimis quoque deleterias istas Dysenterias frequentius atque facilius

lius excitare & inducere solet, confirmantibus id ipsum præcipuè sectionibus anatomicis in cadaveribus morbo hoc defunctorum institutis, quarum beneficio detectum fuit, quod semper vel nimium vitiatus, acrior & corrosivus, vel planè iners, aquosus nimiumque profusus ac ferè omnis ex vesicula sua expulsus fuerit hic humor coeteroquin non prorsus illaudabilis.

§. XVII.

Dum vero hac ratione culpam primariam, quoad hujus affectus excitationem, non immeritò in biliosum laticem, nimium quantum depravatam atque corruptam, rejicimus, minimè propterea alios quoque corporis nostri humores, tam utiles, quam inutiles, gastricum nempe & pancreaticum liquorem, nec non lympham atque serum, penitus abinde exclusos esse volumus, utpote qui itidem, tam ad subeundam noxiam istam cum bile con fermentationem, quam producendum pessimum hunc nostrum affectum, aptissimi existunt, si nimirum vel à causis externis commoti, vel à peregrino miasmate acri, halituofo, intra sanguinis massam delitescente, infecti ac depravati fuerint: Tunc enim humores tales, ex prævia inter se invicem excitata con fermentatione, indolem acido-acrem, corrosivam nacti, sicque pro causa *materiali* hujus affectus satis apti atque qualificati, gravissimas statim in intestinorum canali excitant turbas, dum hinc mucum intestinale & villosam tunicam abradunt, illinc fibrillas & vasa nervosæ membranæ gravissimè vellicant, irritant ac stimulant, & isthinc denique orificia venularum & arteriolarum, in cavitatem intestinorum hiantium, erodunt

erodunt totamque hujus canalis superficiem excoriant, utique hoc pacto, subsequente crebriore teneriorum mucositatum & sanguinis exstillantis propulsione, conjunctisque vehementioribus per totum intestinorum tractum excurrentibus constrictionibus spastico-convulsivis, & crebriores & valdè torminosas tales dejectiones dysentericas facillimè causari possunt.

§. XVIII.

*Causas denique mediatas procatacticas, seu remotiores, quod attinet, variæ utique, imò ferè innumeræ sunt, inter quas, & quidem ex Non-naturalium rerum ordine, in quantum Aër se ad producendum huncce morbum extendat, videatur in A. N. C. Dec. II. Ann. 4. p. 246. & apud HIPPOCRATEM Sect. III. Aphor. 2. 12. 16. § 22. Nocet enim potissimum nebulosus, pluviosus, impurus variisque acribus & fermentescentibus vaporibus infectus, nec non crebriores ejus ex intenso calore in nimium frigus mutationes & vicissitudines; & hinc est, quod non solum mensibus autumnalibus præcipuè, sed & in castris, inprimis vero in regionibus Pannoniæ, omni ferè tempore occurrat & longè lateque grassetur pessimus hic vitæ sanitatisque hostis, quoniam non solum *tantus tepor, mollities & crassities est aëris Hungarici*, (sunt verba supra memorati COBERI in *Observ. med. castrens. Dec. I. p. 49.*) ut, si linteolum aqua, stagnante præsertim, lotum, ad solem siccandum exposueris, totum vermibus Syllanis scaturire brevi post videas; sed insuper quoque, referente eodem Autore l. c. p. 52. *duobus semper cum extremis aër hic colluctatur, aut extrema crassitie nocte & nebulis inspissatus, aut iisdem penitus discussis,**

D

stussis, extrema subtilitate hac, æque ut illa, suspectissimis. --
Hæc autem ab uno extremo ad alterum vicissitudo assidua,
quantam non assuetis vim inferat, concedere, quam experiri
malo. Huic ergo in se jam pessimæ Aëris qualitati si
simul effluvia & miasmata putredinosa sese jungant, ali-
ter certè fieri haud potest, quin gravissimi contagiosi,
inprimis vero fontici tales dysenterici morbi, copio-
sissimo vereque immenso numero producantur & ex-
citentur. Talia vero quod nullibi locorum magis,
quam in castris, & præcipuè Pannonicis, accumulen-
tur & excitentur, ipsa experientia ad nauseam usque
jam docuit, prædictusque COBERVS l. c. p. 58. hisce
verbis confirmavit: Quantum milès noster, data quasi ope-
ra, sordibus & immunditie aërem per se satis suspectum con-
spurare gestiat, absit ut commemorem, cum omnes illi, qui
castrorum spurcitiem vel per transfennam inspexerunt, supinam
militum socordiam vel negligentiam serio detestentur: In ipsis
enim castris, imò, ut mali labes eò longius grassètur, inter
omnes ferè tentoriorum intercapedines, non tantum sordes,
sed cadavera quoque jumentorum hominumque nonnunquam
videas & videndo excandescas. -- Si ergo virulenti aëris
infecti contagio succumbunt illi, qui brevi tempore venenatos
halitus castrenses receperint, quis illum non pro deplorato
babuerit, qui diuturna suetione illos penitus imbibens, fomi-
tem malignæ putredinis coacervaverit illis rebus, quæ salubris
aëris puritati prorsus sunt contrariæ? Quod certe fiet, si ad-
versissimum Germanis aërem Pannonicum solumque invisum
spurcitie castrensi in nos armaverimus.

§. XIX.

Secundum locum in classe procatacticarum cau-
sarum

sarum meritò tribuimus *alimentis*, & quidem præcipuè tam *fermentescibilibus*, quàm corruptibilibus ; ex priorum numero agmen ducunt fructus horæi, tam maturi, quàm immaturi, quos propterea jam olim sedulo evitare jussit Schola Salernitana, his verbis :

Autumni caveas fructus, ne sint tibi luctus.

Et licet non semper in fructuum horum comestionem nimiam, etiam Dysentericæ epidemicæ causa rejicienda sit, cum, teste experienciâ, sæpissimè quoque pueri & infantes lactentes, nec non illi, qui à talibus fructibus plane abstinerunt, itidem gravissimè hoc morbo correpti fuerint ; nihilò tamen minus notum quoque imò notissimum est, quod illa subjecta, quæ fructus tales in majori forsitan quantitate inconsideratè assumserunt, plerumque postea tantò facilius & citius fontico hoc morbo correpta & gravius insimul afflicta fuerint. Cum ergo in Pannonicis castris miles præcipuè mespila, castaneas, avellanas, uvas, pepones, poma & pyra, pruna ac denique fructus omnes fugaces, in deliciis habeat illosque vesanâ prorsus incontinentiâ ingurgitet, quis mirabitur, corporibus pravorum, acrium, fermentativorum & impurorum succorum sentinâ coinquinatis, ingluviei helluones poenas summè meritas dare : Mespila enim, licet quaslibet diarrhœas mitigent aut etiam præcaveant, modò cum ratione fuerint comesta, tamen si in copia & ad satietatem nauseosam usque devorata fuerint, necessario remoram alvinis excretionibus injiciunt, sicque impuritatum nocentissimam accumulationem, Dysentericis inducendis eò magis faventem, simul inducunt.

Peiores his sunt castaneæ, quippe quæ vel solæ, flatulentæ viscositatis suæ procellis, spatiosos coli anfractus distendere & distorquere, crassioris autem suæ substantiæ saburrâ graciliores meatus infarcire atque obstruere, sicque prima ad minimum hujus mali fundamenta ponere solent. Avellanas autem infruticetis columnis passim obvias, familiare quasi Dysenteriis & Lienteriis fomentum præbere, nemo nescit; quemadmodum etiam uvas, hasque vel austeras, vel per-maturas, nec non Pepones, qui in Hungaria longè humidiores & vix non maligniore qualitate, quam ullibi locorum, imbuti sunt, frequentissimè tam diarrhoeas, quam torminosas intestinorum erosiones inducere solere & valere, omnibus notissimum est. Vid. de his plura in Dn. Prof. BÜCHNERI *Miscellan. Phys. Med. Mathemat. Ann. 1729. Mens. Januar. Class. IV.*

❧ XX. ❧

Inter posterioris generis noxia alimenta, nempe *corruptibilia*, eminent inprimis *carnes*, vel semi-crudæ, vel etiam pingviores & crassiores, quas inter merito primo loco ponimus vervecinas Hungaricas, utpote succi crassioris & propter adipem summè noxium & coctû difficillimum, plurimum suspectas, quas, teste COBERO *l. c. Dec. III. p. 40.* nemo facilè, nisi egregiè boni stomachi, impunè, præsertim male masticatas, subegerit: fauces enim gratiâ jucundioris saporis, quî proprius est huic carni, inescatæ, mansu diuturniore sæpè quidem easdem contererent, nisi fames urgens & ventriculus avidior dentibus illas subtraherent; hinc etiam prædictus Autor testatur, plures se in Hungaria vidisse, qui ab inconsiderata ejus comestione in Dysenterias

vix

vix non lethales inciderint. Sic etiam huc pertinent carnes & pisces semi-putridi, casei verminosi, cibi nimium falsi, quæ omnia frequentissima plerumque sunt militum edulia; ut & insolita ostrearum ac piscium marinarum comestio, à quâ itidem gravissimam Dysenteriam aliquando ortam observavit BINNINGERVS *Cent. IV. obs. 84.*

§. XXI.

Ex *potulentis* huc referenda sunt mustum, vinum & cerevisia, recentiora minusque ritè defecata, vel etiam nimis acida, aut in suspectis vasibus metallicis asservata, v. g. in cupreis stanno non obductis, aut argenteis non deauratis, qualia exempla prostant apud BECKERVM in *Tr. von Blutgang*, p. 13. HILDANVM in *observ. p. 669.* & COBERVM *l. c.* Nocent etiam potulenta quælibet actu nimis frigida, corpore præcipuè calente ingurgitata: Nam habet equidem Pannonia sitim ferè clamosam duplici quasi jure sibi familiarem, ob aërem nempe æstuosiores & vini generosioris, præ cerevisia magis usitati, copiosiores assumptionem; qui verò eandem refrigerantibus vel etiam frigidis qualibuscunque unicè restinguere intendit, facile diarrhœas diuturnas, tandem in lethales Dysenterias degenerantes, sibi concitabit. Nocent porro quoque aquæ valdè crudæ, aut minerali quodam infectæ, item stagnantes, turbidæ & putridæ, præcipuè per canales plumbeos fluentes, nec non ex nive liquata collectæ, quæ inter ventrem ducentia numerantur à CELSO, & cum prioribus in castris frequentissimè pro potu ordinario adhibentur; hinc quoque intuitu harum circumstantiarum optimè vereque dixit SENNERTVS in *Praxi sua*, Artic.

de Dysenteria, nullam ferè in Hungaria susceptam fuisse expeditionem, in qua non ex insueta & incauta victus ratione, plures ferè *Dysenteria*, quam ferro obierint.

§. XXII.

Reliquæ vero res non-naturales, videlicet motus animi & corporis vehementiores, inprimis æstivalibus temporibus, vigiliæ immodicæ, ira, terror, metus, &c. dum Spiritus, totamque M. S. ac quicquid impuritatum hinc inde in corpore latitat, nimia commotione turbant, exagitant & orgasticè commovent, facile digestionem vitare, cruditates magis accumulare, confermentationem acriorem earundem accelerare, sicque dispositionem dysentericam inducere valent, id quod etiam de gravioribus circa excreta & retenta occurrentibus turbis expectandum est, quippe quæ, uti in omnibus aliis morbis, sic & in nostro hocce multum pariter contribuere solent, prout id ipsum, inter alia, exemplum à ZACUTO LVSITANO *Prax. admir. Libr. II. Obs. 19.* recensitum, de *Dysenteria* ex hæmorrhoidibus suppressis, luculenter ostendit. Tandem etiam ex ordine rerum præternaturalium varii adhuc adducuntur affectus, quibus quandoque supervenire observatur *Dysenteria*, quique propterea itidem causis procatarcticis annumerantur, veluti sunt febres malignæ, petechiales, Variolæ, Pleuritides, imò ipsi quoque Vermes, quos itidem per intervalla quandoque *Dysenteriam* excitasse refert BONNETVS *Anat. pract. Lib. III. Sect. XI. Obs. 21.* quemadmodum BRANDIVS in *Act. Hassniens. Volum. V. Obs. 31.* gravissimam hanc nostram *Dysenteriam* castren-

castrensem à causa verminosa aliquando obortam esse annotavit. Cum vero utique adhuc sub iudice lis sit, utrum Vermes à dysentericis rejecti revera causam huius affectus procatacticam, an vero producti morbifici titulum mereantur, quoniam per experientiam satis jam cognitum est, quod sub innumeris occasionibus eorundem seminia intra intestina deferri ibique evolvi & explicari queant; hinc non immerito illos affectum non tam causare, quam potius aliunde excitatum fovere, adeoque melius ad morbos, qui Dysenteriae interdum conjungi & supervenire observantur, referri debere putamus.

§. XXIII.

Ratione Prognoseos paucis adhuc notandum est, quod Dysenteria in genere in omnibus subjectis sensibilibus ac junioribus plus semper periculi portendat, quam quidem in robustioribus atque adultis; senes autem & infantes teneriores vix unquam evadunt, quin potius, ob virium extraordinariam imbecillitatem, plerumque succumbunt. Si tenuia intestina magis sub eadem affecta sunt, inprimis verò jejunum, tunc juxta BAGLIVIVM *Prax. Med. Lib. I. p. 74.* ob hepatis viciniam, malum ordinariè gravius redditur, quam si in crassis sedem suam habuerit. Quo major autem graviorum symptomatum est numerus, uti in hac nostra castrensi ferè ordinariè contingere solet, eò periculosior semper censendus erit affectus. Dejectiones, quo magis tantum mucosæ sunt, eo certius aliquam salutis spem relinquunt; quo magis verò striis sanguineis intertextæ apparent, eo gravius malum indicant. Sanguis è
con-

contra sincerus, purus & floridus, si non in admodum magna quantitate excernatur, ancipitis est spei. Confer. HIPPOCRATIS *Aphor. 23. Sect. VII.* Si cum excrementis veluti carunculæ simul prodeant, lethale est, juxta *Aphor. 26. Sect. IV.* Sic etiam si intestina gangræna vel sphacelo jamjam correpta sunt, id quod plerumque excrementa ad viridem, æruginosum, vel etiam nigrum colorem accedentia summumque ac intolerabilem foetorem spargentia, demonstrant, conjunctis insimul febre graviore, extremorum frigore, singultu & facie cadaverosa, juxta *Sect. IV. Aphor. 23. & 24.* Porro, si linguæ nimia ariditas & inflammatio, summa deglutiendi difficultas, vel ipsa etiam Angina, cum singultu & vomitu, deliriis, aphthis, convulsionibus, &c. adsint, tunc sanè certissimus ægri interitus expectandus est, id quod ordinariè ferè in Pannonica nostra Dysenteria accidere solet. Tum verò spem salutis denuò subsecuturæ magnam facimus, si vires adhuc supersint bonæ, appetitus quodammodo constans, febris levior & mitior, excoriatio intestinorum parva & dejectiones parciores ac rariores, quod etiam Hippocrates *Sect. VI. Aphor. I.* confirmat his verbis : *Diuturnis intestinorum levitatibus ructus acidus superveniens, qui prius non fuit, signum bonum.*

§. XXIV.

In *Curatione* denique gravissimi hujus morbi ad quatuor potissimum indicationes respiciendum erit : I.) Vt saburra humorum impurorum, acrium, fermentativorum, plus minus corrosivorum, ex primis viis tempestivè & blandè ejiciatur; II.) Fluxus mucoso-cruentus adhuc continuans successivè & modestè inhibeatur,

beatur, atque excoriatio intestinorum convenienter persanetur; III.) Dolores atque tormina gravissima, tenesmus, aliaque fortè præsentia symptomata secure leniantur & mitigentur, & IV.) Ventriculus unacum intestinorum canali roboretur, tonusque eorundem in gradu convenienti restauretur.

§. XXV.

Primæ indicationi ut oppidò satisfiat, optimè serviunt nunc emetica, nunc cathartica blandiora: Rarò enim, optimè scribit COBERVS l. c. Dec. II. p. 53. imò ferè nulum in castris ex fædis alvi profluviiis feliciter retraxeris, nisi omnium primò, satis etiam forti purgante, modo vires admittant, Cacochymia sentinam rejeceris. Turgent enim, ut sæpius inculcatum, tempore autumnali, corpora pravis succis, quos ingluvies & intemperantia militaris ad certissimum interitum undique comportat; quoniam tanta plerumque est incontinentia castrensis, tamque laxis habenis quisque in fructuum horariorum penu irrumpit, ut vix ipsa morte suppliciique metu miles à virulentis hisce delitiis retrahi possit, adeoque plures singulis mensibus autumnalibus, referente præfato Autore, intra decennium Dysenteriâ hacce Pannonicâ, quam à Turcis interemti fuerint. Horum autem evacuantium medicamentorum, licet hinc inde specifica ab Autoribus commendentur, operatio ferè promiscue se habere videtur, ut perinde sit, an hoc vel illud seligatur, modo resinosa, acria atque salina evitentur, à quibus mali exasperatio & ipsa mors procul dubio timenda foret. Interim tamen inter vomitoria, statim in principio morbi exhibenda, non immeritò præferendam esse cen-

seo decantatam illam atque Parisiensium Medico celeberrimo, D. HELVETIO, quondam admodum lucriferam radicem Americanam *Ypecacuannam*, à PISONE in *Hist. Ind. utr. nat. Lib. IV. cap. 53.* prius descriptam & orbi literato communicatam, quæ ad 3ß. cum unico Fri emet. grano acuata, optimè tunc propinari potest; Quemadmodum, si laxantia magis convenientia fore ex circumstantiis judicaverit Medicus, utique reliquis palmam facile præripiet *Rhabarbarum Orientale* in pulv. præcipuè ad ʒij. vel 3ß. cum brodio carnis propinandum.

§. XXVI.

His præmissis ad *secundæ indicationis* executionem progrediendum erit, exhibendo in hunc scopum pulveres ex absorbentibus tenerioribus, v. g. Matr. perlar. Conch. ppt. Oc. cancr. Cryst. mont. C. C. philos. ppt. ʒʒ nat. & paucissimo \odot o paratos, nec non decocta abstergentia & moderatè roborantia, ex Rad. Caryoph. Ulmar. carlin. chin. farsap. herb. veron. beton. sanic. pyr. Flor. rosar. r. bellid. papav. rh. chamom. hyper. hord. excort. farin. oryz. &c. quæ in castris præcipuè admodum proficua esse experta sunt; item Emulsiones ex amygd. rec. exc. Pin. pistac. sem. pap. alb. violar. cum aq. fontan. vel dest. quadam paratæ, additis jam recensitis absorbentibus & antim. diaph. cum sacch. ros. modicè edulcorandæ; porro in forma media *Electuaria* ex conf. ros. antiq. flor. bellid. Elect. diascord. conf. de hyac. incompl. ther. androm. sang. drac. & syr. cort. querc. concinnata; aut denique etiam pulv. diapnoicotonici, ex Antimon. diaphor. bezoard. min. terr. sig. alb. Cor. r. ppt. Viper. ppt. thure vel mastich. Cort.

Cort. Cascar. & Nuc. Mosch. compositi; quibus omnibustamen sedulò clysteres abstergentes & lubricantes, aut etiam prædicta rhabarbarina, aliquoties interponenda sunt, ne simultaneo forsitan actu intempestivè supprimatur fonticus iste fluxus.

§. XXVII.

Tertiæ indicationi satisfieri potest per in- & externa lenientia, paregorica, carminativa temperata, atque secura anodyna, moderatè tamen & parcius propinanda, quo fine internè optimè conveniunt Decocta diluentia, lubricantia & mucilaginosà, ex Hord. & Aven. excort. C. C. rasp. Rad. Scorzon. Cichor. & Lapp. maj. parata, aut etiam loco horum brodium carnis, Seminibus Cumin. Carv. Anis. Fœnic. Aneth. Cum. &c. fervidè affusum & illicò colatum, propinari potest, quod egregiè juvat &, teste celeb. Argentoratensium Medico, D. SCHEIDIO b. m. multiplici experientia in ipsis etiam castris comprobatum fuit. His vero præter spem nihil proficientibus, tandem MP. de Cynogl. gr. j. vel etiam Ther. cœl. gr. β. vel $\frac{1}{4}$ prædictis pulveribus absorbentibus sociari & vespertinis horis quandoque propinari potest; Externè vero optimum levamen tunc adferunt Clysteres lenientes & paregorici, ex Brod. Carn. vitul. aut vervec. Rad. Alth. Malv. Helen. Cich. Flor. Chamom. Melil. Mucil. Sem. Psyll. Thereb. in vit. ovi solut. Ther. Andr. & ʒ Cham. parati, nec non Fotus & Infessus ex Herb. & Flor. Chamom. Linar. Melil. Hyper. Samb. Verbasc. &c. compositi, quibus & dolores & ipse tenesmus atrocior paulatim felicissimè mitigari & profligari poterunt.

§. XXVIII.

Sublato hâc ratione truculento hocce affectu, tandem pro *quarta indicatione* impetranda, usitata remedia stomachica & tonica subjungenda erunt, videl. pulvis stomach. Birckm. & Quercet. Ess. Absynth. comp. aut Ess. Galang. Zedoar. Gent. r. TR. ☉. ꝑtis Ludov. aut cum succ. pomor. parata, aliaque, combinando simul congruam & accuratam Diætam, quippe quæ alias circa morbos castrenses dimidiam ferè partem curationis absolvit, ita ut aër frigidior & nebulosus, quantum possibile, evitetur, potulenta non nimium frigida, crassa ac feculenta, sed tenuia, diluentia, moderatè calida, cibique facilioris digestionis & laudabilis succi, præbeantur, utpote juscula ex Cremore Hordei & Avenæ, item gallinacea & bubula cum Oryza cocta, caro agnina, vitulina, pultes ex lacte & frugibus paratæ, cerasa sicca cum aliquantulo vini decocta & pulvere Cinnamon. aromatizata, aliaque tam confortantia, quam nutrientia, quippe in quorum recto & moderato usu tantum spei in hoc morbo plerumque collocandum est, quantum in magna medicamentorum faragine alii frustra quæerunt.

T A N T V M.

* * *

Non veniunt ulli insignes sine Marte triumphi,
Nec nisi certanti digna corona datur.
Sic quoque certavit FELSMANNVS fortiter armis,
Hinc ipsi laurum magnus Apollo dedit.
Clarescas, crescas, vigeas per Nestoris annos,
Vtque Tibi & Patriæ fertilis esse queas.

Ita

PRÆSES.

Felix in celsa *petra* qui collocat ædes,
Non imbres, ruptis nubibus, ille timet.
Sic fundamentis FELSMANNI nititur altis
Doctrina & solidis, ceu *petra* firma, suis.
Tutum hinc perfugium, quorum contagia sternunt
Corpora, ut illuvies obvia cuncta rapit.
Tunc hac effugient in *petra* sæva pericla
Dum miserâ multos morte perire vident.
Sic fama exsurget Tibi, quam ventosa nec unquam
Isthac in *petra* murmura lingua quatit.
Addet plura Deus bona, quando inniteris usque
Christo, qui solus *Petra* salutis adest.

Ita

*Nobilissimo atque Doctissimo Dno Doctorando,
cum voto omnigenæ felicitatis, sincero
affectu applaudit*

D. ANDREAS ELIAS Büchner/

Institut. Med. Prof. Publ. Fac. Med.
Assess. Extraord. & S. R. I. Academ.
Nat. Curios. Collega.

* * *

Geh, Werthgeschätzter Freund/ so sagte dazu-
mahl

Ich und mein ganzes Haus, der Freunde grosse
Zahl,

Geh, reise höchst-beglückt nach dem beliebten Sachsen,
GOTT lasse Dich daselbst an Kunst und Weisheit
wachsen!

Nun meldet mir Dein Brief von Deiner Wiederkunft,
Doch ehe die geschicht, so wirst Du in die Zunft,
Mit allem Ruhm und Preis, derselben aufgenommen,
Die mit dem grossen D. zu uns zurücke kommen.

Ich gratulire Dir, die Meinen thun es auch,
Ich handele dabey nach Pflicht und nach Gebrauch,
Und setzen diesen Wundsch zu Deiner neuen Bürde,
Sie sey Dir eine Lust und niemahls eine Bürde.
Der Geist komm' über Dich der Männer dieser Stadt,
Die Dich bisher ernährt und aufbehalten hat,
Von denen uns bekannt, ja schon vor vielen Jahren,
Daß Sie in Medicis berühmt und hocherfahren.

Seh bey der Wiederkunft ein Hohberg in der That,
Dem Liegnitz vieles Wohl mit Recht zu danken hat.
Hast Du gelernt, wie Hahn in Schweidnitz, zu cu-
riren,

So kannst Du schon mit Ruhm den Doctor-Titul füh-
ren;

Ich

Ich zweiffle nicht daran, weil mir genug bekannt,
Daß Du von Jugend an viel Fleiß daran gewandt,
Komm nur, und laß uns bald die Proben davon sehen,
Wie Krancke wohl curirt aus ihren Betten gehen.

Hiemit wolte, seinem ehemaligen Verspre-
chen nach, dem Herrn Doctoranden
zu erlangter Würde gratuliren

Ein aufrichtiger Freund,

Johann Christoph Heinske/
Pastor in Sebnitz.

SS Er seines Wissens Grund auf Fels und Klip-
pen baut,
Und nicht auf leichten Wind verworffner
Dinge traut,
Wer nicht statt Körner Spreu in Hirn und Schädel
fasset,
Und statt bewährter Kunst auf neue Grillen passet,
Der kan, wenn Sturm und Wind auch über ihn er-
gehn,
Bey seiner Wissenschaft doch als ein Mann bestehn.
Er kan den falschen Dunst verkehrt-gelehrter Sachen
Durch die Realitât gar bald entlarvet machen.
Hochwerthgeschätzter Freund! Dein Nahme
zeigt an,
Was Schlesien von Dir vor schönes hoffen kan.

Was

Was sich vor Wissenschaft bey Dir, mein Felsmann/
findet,

Hat Zittau, Leipzig, Hall auf Felsen fest gegründet;
Nun schenckt Gerana Dir vor Müh und Fleiß den
Lohn,

Und setzt auf Deinen Bau die schöne Ehren-Cron,
Die allen, wer sie sieht, wird klares Zeugniß geben,
Es müsse nur Dein Thun nach festem Grunde streben.

Dein Glück müsse denn nun auch auf Felsen ruhn,
Des Höchsten Allmachts Hand befördere Dein Thun,
Und lasse jederzeit, bis zu den späten Jahren,
Dich Segen, Wohlfahrt, Heyl, von seiner Huld er-
fahren;

Und wenn es künftigt Dir nach solcher Art ergeht,
So dencke auch an den, der noch zurücke steht,
Der sein Glücks-Schiff noch auf wilden Wellen treibet,
Daß Deine Treu zu ihm auch Felsen-feste bleibet.

Mit diesem wenigen recommendiret sich
dem Herrn Auctori zu beständig-ge-
neigtem Andencken und Freundschaft
ein Desselben getreuer Diener und
Landsmann,

Abraham John/ Med. Stud.

Lignic. Siles. Adelsdorff.